

**Oqaluuserisassanut nassuiaat.**

(Inatsisartut Siulittaasuat)

Nunanut Allanut Sillimaniarnermullu Ataatsimiititaliaq qinnuteqarpoq imm. 52-ip aappassaa-neernejarnissaata kinguartinneqarnissaanik. Siunnersuutip qulequtaraa:

Atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut Kalaallit Nunaata ilanngunneqarnissaanik matumalu aalajangiiffigisassatut siunnersuutip akuerineqarnerata kingunitsianngua tamatuma sulissutigineqalernissaa aallartinneqaqqullugu Naalakkersuisut eqquneqarnissaannik Inatsisartut aalajangiiffigisassaattut siunnersuut.

Taarsiullugu siunnersuut 2014-imi ukiakkut ataatsimiinnermi aappassaa-neernejassaaq.

Inuussutissarsiornermut Ataatsimiititaliaq immikkoortunut 20-mut 21-mullu ilassutitut isumaliutissiissuteqarpoq, tassami ataatsimiititaliap isumaqatigiittup aalajangiiffigisassatut siunnersuutitut marluusunut tamanut ataasiinnarmik assigiissumillu allannguutissatut siunnersuuteqarluni.

Tamanna tunngavigalugu ataatsimiititaliap siunnersuutit taakku marluk Inatsisartut ulloq 5. juni ataatsimiinneranni ataatsimut oqaluuserineqarnissaanik, taamatullu aamma aalajangiiffigisassatut siunnersuutitut marluusunut ataatsimiititaliap allannguutissatut siunnersuutaa pillugu ataasiaannarluni ataatsimut qinersisoqarnissaanik, qinnuteqarpoq.

Immikkoortut pineqartut tassaapput, imm 20: Naalakkersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliarinninnissamik peqquneqarnissaannik Inatsisartut aalajangiiffigisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uningaannartut inuiaqatigiit akornanni sulisinneqalernissaannik, nunaqarfinni aalisakkerivinnik sullissinissamat isumaqatigiissutitut aningaasaliissutit amerlineqarnissaannik kiisalu illersorneqarsinnaasumik aalisagartassat amerlineqarnissaannik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq, aamma imm 21: Nunatsinni annertuumik suliffissaaleqinerup piaartumik ataavartumillu annikillisinneqarnissaa siunertaralugu Naalakkersuisut ataatsimoorumik periusissamik Inatsisartunut saqqummiussaqaarnissaannik Inatsisartut aalajangiiffigisassaattut siunnersuut.

Imm 179: Apeqquteqaat aallaavigalugu teknologimut nutaamut misileraavimmik assersuutigalugu qillerinernut, avatangiisinik eqqarsaatiginninnermut uuliakoortoqarsimatillugulu salinernut atatillugu ilinniarfinnut, aatsitassarsiornermi ingerlatseqatigiiffinnut kattuffinnullu allanut ilisimatusarnermi, misileraanermi takussutissiornermilu neqeroorfiusartussamik pilersitsinissaq pillugu oqallisissiatut siunnersuut, ulloq 28. majimiit ullumimut kinguartitaavoq.

Siunnersuuteqartup imm. 63 tunuartippaa. Taassuma qulequtaraa: Atuartuni angajullerni klassinik inuussutissarsiornermi apeqqutini sammisaqartitsinikkut ilinniartitsisoqartalernissaa siunertaralugu Meeqqat atuarfianni peqqussut allanngortinneqassanersoq pillugu apeqquteqaat aallaavigalugu oqallittoqarnissaanik siunnersuut.

Immikkoortoq ulloq 5. juni oqaluuserineqartussaagalarpoq.

**Ilaasortat uku taasisarnerit pillugu isumaqatigiissuteqarput:**

Sara Olsvig, Inuit Ataqatigiit aamma Aleqa Hammond, Siumut  
Per Berthelsen, Siumut aamma Naaja Nathanielsen, Inuit Ataqatigiit  
Vittus Mikaelson, Siumut aamma Juliane Henningsen, Inuit Ataqatigiit